

রাজা

অকিঞ্চনের দল। ঠাকুর্দা, তোমাকে খুঁজে আজ আমাদের
দেরি হ'য়ে গেল।

ঠাকুর্দা। আজ আমি দ্বারে, আজ আমাকে অণু জায়গায়
খুঁজলে মিলবে কেন ?

প্রথম। তুমি যে আমাদের উৎসবের সূত্রধর।

ঠাকুর্দা। তাই ত আমি দ্বারে।

দ্বিতীয়। আজ তুমি বুঝি এই কুণ্ড স্তম্ভন মুষল তোষল
এদের নিয়েই আছ ? দেশ বিদেশের কত রাজা এল
তাদের সঙ্গে পরিচয় করে' নেবে না।

ঠাকুর্দা। ভাই, এরা সব সরল লোক—চুপ করে' কেবল
এদের পাশে দাঁড়িয়ে থাকলেও এরা ভাবে এদের যেন
কত সেবা করলুম, আর যারা মস্ত লোক তাদের
কাছে মুণ্ডটা ও যদি খাঁসিয়ে দেওয়া যায় তা'রা মনে
করে লোকটা বাজে জিনিষ দিয়ে ঠকিয়ে গেল।

প্রথম। এখন চল দাদা !

ঠাকুর্দা। না ভাই, আজ আমার এইখানে দাঁড়িয়ে দাঁড়িয়েই
চলা। সকলের চলাচলেই আমার মন ছুটেছে। তবে
আর কি, এইবারে শুরু করা যাক !

সকলের গান

মোদের কিছু নাই রে নাই,

আমরা ঘরে বাইরে গাই

তাইরে নাইরে নাইরে না।

যতই দিবস যায় রে যায়
 গাই রে সুখে হায় রে হায়
 তাইরে নাইরে নাইরে না ।
 যারা সোনার চোরাবালির পরে
 পাকা বরের ভিত্তি গড়ে
 তাদের সামনে মোরা গান গেয়ে যাই
 তাইরে নাইরে নাইরে না
 যখন থেকে থেকে গাঁঠের পানে
 গাঁঠকাটার দৃষ্টি হানে,
 তখন শূন্য ঝুলি দেখায় গাই
 তাইরে নাইরে নাইরে না ।
 যখন দ্বারে আসে মরণ বৃড়ি,
 মুখে তাহার বাজাই তুড়ি,
 তখন তান দিয়ে গান জুড়ি রে ভাই
 তাইরে নাইরে নাইরে না ।
 এ যে বসন্তরাজ এসেছে আজ
 বাইরে তাহার উজ্জল সাজ,
 গুরে অন্তরে তা'র বৈরাগী গায়
 তাইরে নাইরে নাইরে না ।
 সে যে উৎসবদিন চুকিয়ে দিয়ে
 ঝরিয়ে দিয়ে শুকিয়ে দিয়ে
 দুই রিক্ত হাতে তাল দিয়ে গায়
 তাইরে নাইরে নাইরে না ।